



Հաստատում եմ

ԵԳՊԱ ղեկավար

Ս. Է. Բաաբեկյան

« 02 » 06 2014թ.

ԵԳՊԱ

Բակալավրական ավարտական  
աշխատանքի և մագիստրոսական  
թեզի պատրաստման ուղեցույց

Բակալավրական (Բակ)  
և Մագիստրոսական (Մագ) ծրագրերի  
շրջանավարտների համար

ԵՐԵՎԱՆ 2014

## Նախաբան

Սույն փաստաթուղթը Երևանի գեղարվեստի պետական ակադեմիայի (ԵԳՊԱ) բակալավրական և մագիստրոսական աստիճաններում ավարտական աշխատանքի և թեզի պատրաստման և ներկայացման ընդհանուր ուղեցույց է: Այն իրազեկում է համաձայն Հայաստանի ազգային որակավորումների շրջանակի՝ որակավորումների արդյունքը վկայող ավարտական փաստաթղթերի պատրաստման, ներկայացման և պաշտպանության հետ առնչվող քաղաքականության և գործընթացների մասին:

Սույն փաստաթուղթը սահմանում է ԵԳՊԱ - ՈՒՍԱՆՈՂ փոխհարաբերությունն ու փոխըմբռնումը և նպատակ ունի կանխել հնարավոր խնդիրների ծագումը:

Ուղեցույցը ծանուցում է ավարտական աշխատանքի պատրաստման, ներկայացման և պաշտպանության ընթացքում ուսանողի իրավունքների և պարտականությունների մասին, ինչպես նաև հստակեցնում է ԵԳՊԱ-ի և մասնավորապես՝ ավարտական աշխատանքի ղեկավարների պարտականությունները:

## **Բովանդակություն**

<b>Բովանդակություն .....</b>	<b>3</b>
<b>Ներածություն .....</b>	<b>4</b>
<b>Ընդհանուր ուղեցույց Բակալավրական և մագիստրոսական շրջանավարտների համար.....</b>	<b>5</b>
<b>Բակալավրական և մագիստրոսական ավարտագրերի ձևաչափ .....</b>	<b>6</b>
<b>Բակալավրական և մագիստրոսական ավարտագրերի բաժինները.....</b>	<b>7</b>
<b>Փաստաթղթերի փաթեթ .....</b>	<b>10</b>

## Ներածություն

Ընդհանուր առմամբ, թեզը՝ ավարտական աշխատանքը, արտացոլում է ուսումնառության ողջ ժամանակաշրջանի և մասնավորապես ավարտական աշխատանքի պատրաստման ընթացքում ուսանողի ձեռք բերած գիտելիքները: Ավարտական աշխատանքում ուսանողները պետք է ներկայացնեն հետազոտության առարկա եղած հիմնական խնդրի/խնդիրների շուրջ արված իրենց եզրակացությունները, պարզաբանեն հետազոտության ընթացքում կիրառված արվեստաբանական և տեսական մեթոդներն ու նշեն, թե այս փորձառությունը ինչ ազդեցություն կունենա իրենց հետագա ծրագրերի վրա:

ԵԳՊԱ-ի կողմից առաջարկվող ուսումնական ծրագրերում *Բակալավրի (ԲԱԿ)* և *Մագիստրոսի (ՄԱԳ)* աստիճանները շնորհվում են ավարտական աշխատանքի պաշտպանությունից հետո: Վերջինն արտացոլում է ուսանողների որակավորումների արդյունքը՝ ՀՀ որակավորումների ազգային շրջանակին համապատասխան, և պետք է ցուցադրի ուսանողի դրսևորած ստեղծագործական միտքը, ինքնատիպությունը և մասնագիտական մակարդակով արվեստին տիրապետելու ունակությունը:

## Ընդհանուր ուղեցույց բակալավրական և մագիստրոսական շրջանավարտների համար

ԲԱԿ և ՄԱԳ ավարտական աշխատանքը արվեստի բակալավրի և մագիստրոսի աստիճան ստանալու համար ներկայացվող վերջին պահանջն է: Բակալավրիատի ուսանողները վեցերորդ կիսամյակի ավարտին, իսկ մագիստրատուրայի ուսանողները՝ առաջին կիսամյակի ավարտին, ամբիոն են ներկայացնում ընտրված թեմայի նախնական ուրվագիծը, որից հետո ընտրվում են ավարտական աշխատանքների/թեզերի գիտական ղեկավարներ, որոնք պետք է լինեն ԵԳՊԱ դասախոսական կազմից: Յուրաքանչյուր ուսանողին կցվում է մեկ ղեկավար: Ղեկավարները պարբերաբար հանդիպում են ուսանողների հետ՝ թեման համատեղ քննարկելու և մշակելու, ինչպես նաև արվեստանոցային աշխատանքի ընթացքին հետևելու համար: Ղեկավարները խորհուրդներ են տալիս և օգնում են ուսանողներին՝ ավարտական աշխատանքի/թեզի պատրաստման հետ կապված բոլոր տիպի խնդիրներում:

ԲԱԿ ուսանողները ուսումնառության ավարտական տարում, իսկ ՄԱԳ ուսանողները՝ երկրորդ կիսամյակի սկզբից, սկսում են աշխատել ավարտական աշխատանքի նախագծի վրա:

ԲԱԿ և ՄԱԳ ավարտական աշխատանքի նախագծերը կազմված են երկու գլխավոր մասից (*Կերպարվեստի պատմություն և տեսություն մասնագիտության ավարտական աշխատանքը՝ մեկ գրավոր մասից*). և պետք է մշակվեն դասախոսի անմիջական ղեկավարությամբ:

Դրանք են՝

- Ավարտական աշխատանքի/թեզի պորտֆոլիո, որտեղ բացի վերջնական բուն աշխատանքից ներառված կլինեն նաև ուսանողի ուսումնառության ընթացքում կատարած առնվազն 5 լավագույն աշխատանքները, ավարտական աշխատանքի նախագիծը և էսքիզները:
- Ավարտական աշխատանքը/թեզը ներկայացնող տեսական-հետազոտական գրավոր շարադրանք՝ ավարտագիր, որտեղ քննության են առնվում աշխատանքի էլակետային թեմաները, վերլուծվում են կատարման առանձնահատկությունները և մեկնաբանվում դրանց առնչվող անհատական, պատմական և գաղափարական խնդիրները:
- *Կերպարվեստի պատմություն և տեսություն մասնագիտության ավարտագիրը* ներկայացնում է ընտրված թեմայի կամ գիտական

խնդրի շուրջ ընդհանրական, հետազոտական և վերլուծական բուն աշխատանքը:

## Բակլավրական և մագիստրոսական ավարտագրերի ձևաչափ

Բակլավրական և մագիստրոսական ավարտագրերը պետք է ներկայացվեն քննարկման և տպագրման ըստ հետևյալ պաշտոնական ձևաչափի և կարգի.

Ավարտագիրը պետք է պատրաստված լինի A4 չափի թղթի վրա, ինչպես նաև սրբագրված լինի վրիպակային, ուղղագրական և կետադրական սխալներից: Բակլավրի ավարտագրի ծավալը, ներառյալ Մատենագիտական ցանկը, պետք է լինի 10-15 էջ (Կերպարվեստի պատմություն և տեսություն մասնագիտության համար՝ 40-45), իսկ մագիստրոսինը՝ 20-25 էջ (Կերպարվեստի պատմություն և տեսություն մասնագիտության համար 55-60): Պատկերային նյութը, աղյուսակները, գծագրերը չեն ընդգրկվում այս ծավալի մեջ: Այս ցուցումներն իհարկե ընդհանուր չափանիշներ են. յուրաքանչյուր աշխատանք պետք է արժանանա նախ ղեկավարի հավանությանը, ապա ամբիոնի դրական կարծիքին:

Անհրաժեշտ է ներկայացնել ԲԱԿ/ՄԱԳ թեզի ավարտագրի երկու օրինակ: Դրանցից մեկը կվերադարձվի ուսանողին գրախոսվելուց հետո, իսկ մյուսը կմնա համապատասխան ամբիոնի դարանում: Երկու օրինակներն էլ պետք նույնական լինեն և համապատասխանեն ձևաչափային բոլոր պահանջներին.

- ԲԱԿ/ՄԱԳ ավարտագրի տեքստը պետք է մուտքագրվի ստանդարտ A4 չափի սպիտակ թղթի վրա և տպագրվի տպիչով (printer):
- Ամբողջ շարադրանքի տառատեսակը պետք է լինի միանման՝ ցանկացած յունիկոդ տառատեսակով, տառաչափը՝ 12 կետաչափ:
- Տողամիջի տարածությունը պետք է լինի 1,5 չափի:
- Լուսանցքները բոլոր կողմերից պետք է լինեն 2 սմ:
- Էջերը պետք է համարակալված լինեն էջի ստորին աջ անկյունում և չպետք է ներառեն ուսանողի անունը կամ աշխատանքի վերնագիրը:

Ուսանողները պետք է սկսեն աշխատել *ավարտագրի շարադրանքի* վրա թեմաները հաստատվելուց անմիջապես հետո՝ պարբերաբար գիտական ղեկավարի հետ հանգամանորեն քննարկելով և՛ շարադրվելիք նյութը և աշխատանք(ներ)ը:

Պետք է հաշվի առնել, որ ընդհանրապես ավարտագիրը կարող է մեկ կամ երկու վերընթերցման և մի շարք փոփոխությունների կարիք ունենալ, ըստ այդմ էլ՝ հաճախ մի քանի անգամ փոխանցվել ուսանողի և ղեկավարի միջև: Այս գործընթացը պետք է ավարտին հասցվի մինչև սահմանված վերջնաժամկետը, ուստի ավարտագրի նախնական տարբերակը պետք է

ղեկավարին հանձնվի պաշտպանության ժամկետից առնվազն չորս շաբաթ առաջ: Եթե ղեկավարը գտնում է, որ ուսանողը պատրաստ չէ լավագույնս հանդես գալու՝ կարող է վերջինիս խորհուրդ տալ հետաձգել պաշտպանությունը մինչև հաջորդ տարի: Ցանկացած հետաձգման համար անհրաժեշտ է ամբիոնի կարծիքը, ապա՝ արվեստի ԱԳՄ հանձնաժողովի համաձայնությունը:

## ԲԱԿ և ՄԱԳ ավարտագրերի բաժինները

Ավարտագիրը պետք է բաղկացած լինի հետևյալ բաժիններից.

- **Տիտղոսաթերթ** – (տե՛ս Հավելված 1) որտեղ MS Word ծրագրով պետք է գրված լինեն ավարտական աշխատանքի/թեզի վերնագիրը, ուսանողի անունը և ազգանունը, ավարտելու տարին, գիտական ղեկավարի և գրախոսի անունները՝ համապատասխան ստորագրություններով.
- **Երախտիքի խոսքը կամ Երախտագիրը** համարվում է գլխավոր վերնագիր և պետք է տպված լինի ըստ ձևաչափի՝ ինչպես ավարտագրի մյուս գլխավոր վերնագրերը:
- **Բովանդակություն** բաժինը պետք է մուտքագրվի՝ օգտագործելով “Document Elements” ֆունկցիան Word ծրագրով:
- **Աղյուսակների, նկարների, գծագրերի ցանկ**
- **Համառոտագիր** երկու-երեք պարբերությամբ պետք է ներկայացնի ավարտագրի նախագիծը և բանալի բառերը՝ համացանցում որոնում կատարելու համար:
- **Ներածություն**՝ 3-5 էջի սահմաններում, որտեղ ուսանողը համառոտում է իր ավարտական աշխատանքը հետևյալ սկզբունքով.
  - ա) հիմնավորում է ավարտական աշխատանքի/թեզի թեմայի ընտրությունը,
  - բ) մեկնաբանում է իր աշխատանքի կրած արվեստային ազդեցությունները՝ նշելով այն հեղինակներին և ստեղծագործությունները, որոնք հատկապես էական ուղղորդող դեր են խաղացել ուսանողի աշխատանքի թեմատիկ բովանդակության, ոճի և արտահայտչամիջոցների վրա,
  - գ) նշում է, թե ըստ իրեն ավարտագրում և ամբողջ ստեղծագործական աշխատանքում որն է իր անհատական գեղարվեստական ոճը՝ փորձելով այն դիտարկել պատմական համատեքստում,

դ) ներկայացնում է այն կարևորագույն բնագավառները, որոնք նպաստել են իր՝ որպես արվեստագետի աճին կերպարվեստի բակալավրի/ մագիստրոսի ծրագրով ուսանելու ընթացքում:

- *Կերպարվեստի պատմություն և տեսություն մասնագիտության ուսանողների ավարտագրի Ներածությունը (5-8 էջ) ընդգրկում է ընտրված թեմայի ընդհանուր ներկայացումը, հիմնավորումը, «հարցի պատմությունը» և կատարվելիք հետազոտական աշխատանքը՝ ըստ թեմատիկ բաժանումների:*
- **Հետազոտական վերլուծությունը**
  - Լուսաբանում է ավարտական աշխատանքի նախագծի շուրջ կատարված հետազոտությունը, թե ինչպես է հետազոտությունը ազդել թեմայի հանդեպ ուսանողի մոտեցման վրա:
  - Հանգամանորեն դիտարկում է աշխատանքը արվեստի տվյալ ճյուղի մասնագիտական համատեքստում:
  - Բացահայտում է նախագծի մտահաղացման կապը այդ թեմայով արդեն իսկ գոյություն ունեցող ստեղծագործական աշխատանքների և գրականության հետ, ինչպես նաև ցույց է տալիս, թե ինչով է նպաստում ավարտական աշխատանքը արվեստի տվյալ ճյուղի ձեռքբերումներին:
- *Կերպարվեստի պատմություն և տեսություն մասնագիտության ավարտագրի բուն հետազոտական աշխատանքը բաղկացած է երկու և ավել մասերից կամ մի քանի գլուխներից (անհրաժեշտության դեպքում՝ ենթագլուխներից և ենթավերնագրերից), որոնցից յուրաքանչյուրը պարունակում է թեմային վերաբերող առանձին հարցի, նյութի կամ խնդրի ներկայացում, հետազոտություն և վերլուծություն:*
- **Ավարտական աշխատանքի պատրաստման գործընթաց բաժինը.**
  - Վերաբերում է բուն ստեղծագործական աշխատանքի պատրաստման գործընթացին: Ուսանողները պետք է ներկայացնեն, թե ինչ էին նախատեսել անել և ինչն են կարողացել իրականացնել, թե ինչպիսի հաշվարկված և անկանխատեսելի խոչընդոտների են հանդիպել և ինչպես են կարողացել դրանք հաղթահարել, վերջապես՝ թե ինչ ուսանելի սխալներ են թույլ տվել աշխատանքի ծավալման ընթացքում:
  - Ներկայացվում է, թե ուսանողները ինչ են հասկացել և ինչպիսի եզրահանգումների են եկել կոնկրետ ավարտական աշխատանքի, ընդհանրապես իրենց՝ որպես արվեստագետի հուզականության վերաբերյալ և թե ինչպիսի մոտեցումներ են ցուցաբերելու հետագա նախագծերի հանդեպ:



- Ավարտական աշխատանքի հրապարակայնացում բաժինը
  - Սահմանում է հասարակական շրջանակը, որին հասցեագրված է ուսանողի ավարտական նախագիծը. արդյոք նրանք մտադիր են այդ նախագիծը հասարակական ուշաբության և հանրային քննարկումների առարկա դարձնել, եթե այո՝ ինչպես են հասնելու այս նպատակին, և որն է ավարտական նախագիծը հրապարակայնացնելու իրենց պլանը:
  - Շոշափում է բոլոր իրավական հարցերը, որ վերաբերում են ծրագրի շրջանակներից դուրս իրենց ավարտական աշխատանքի նախագիծը հրապարակայնացնելու հնարավորություններին: Եթե նախագիծը ներառում է հեղինակային իրավունքով պաշտպանված չլիցենզավորված նյութ, ապա ուսանողները պետք է հանգամանորեն պարզաբանեն և հիմնավորեն, որ միանգամայն անշահադիտական նպատակով են օգտագործել այդ կողմնակի տարրերը իրենց նախագծում:
  
- *Կերպարվեստի պատմություն և տեսություն մասնագիտության ավարտագիրն ավարտվում է Եզրակացությամբ, որտեղ ուսանողը հակիրճ ամփոփում է կատարած աշխատանքը և ներկայացնում հետազոտության արդյունքում պարզված եզրակացությունները:*
  
- *Մատենագիտական ցանկ* բաժինը
  - Ընդգրկում է առնվազն 10 (ԲԱԿ) և 20 (ՄԱԳ) անուն գիրք, հոդված, էլ-կայք, ֆիլմ, տեսանյութ և այլ հետազոտական աղբյուրներ: Մատենագիտության նշված աղբյուրների մեծ մասը պետք է հղված կամ մեջբերված լինեն ավարտագրի բուն շարադրանքում և բովանդակային առումով համապատասխանեն դրան: Մատենագիտական ցանկը կազմվում է հայատառ/ռուսատառ/լատինատառ (կամ՝ լատինատառ/ռուսատառ՝ ըստ թվարկված ծավալի) հաջորդականությամբ: Բնտերնետային հղումները պետք է, բացի կայքի հասցեից, ունենան բովանդակային տվյալներ (հեղինակ, վերնագիր, սյուժեի անվանում) և ընդգրկեն կայքին հղելու ճշգրիտ ամսաթիվը:
  
- *Կերպարվեստի պատմություն և տեսություն մասնագիտության մատենագիտական ցանկը կարող է, ըստ պահանջի, կազմված լինել «սկզբնաղբյուրներ» և «գիտական գրականություն» մասերից:*

• **Հավելված**

- Ներկայացվում են ավարտական աշխատանքին վերաբերող ցանկացած լրացուցիչ փաստաթուղթ, տեղեկանք, պորտֆոլիոյի հավաստագիր, հարցաթերթիկներ, այլ հավելյալ նյութեր, որոնք նախագծի համար կարևոր են, բայց վճռորոշ չեն:
- Հավելվածները պետք է նշվեն *Բովանդակության* մեջ՝ համարակալումով (Հավելված 1, 2...) կամ տառով (Հավելված Ա, Բ...) և վերնագրով, որն ընդհանուր առմամբ նկարագրում է յուրաքանչյուր հավելվածի բովանդակությունը:
- Ինչպես բոլոր վերնագրերը, այնպես էլ հավելվածի վերնագրերը պետք է ունենան միևնույն տառատեսակը, ձևաչափը և ոճը:
- Նույնիսկ եթե հավելվածի նյութն իր բնօրինակ տեսքով է ներկայացվում ավարտագրում այն պետք է համապատասխանի ուղեցույցում պահանջված լուսանցքային ձևաչափին:
- Եթե առկա է մեկ հավելված, ապա պետք է նշել միայն վերջինիս վերնագիրը՝ առանց համարի կամ տառի:

**Ավարտական աշխատանքի հաստատում**

Ղեկավարը և գրախոսը իրենց հաստատումը պետք է վավերացնեն՝ ավարտագրի տիտղոսաթերթի վրա ստորագրելով: Այնուհետև ավարտական աշխատանքը/թեզը հաստատման է ներկայացվում համապատասխան ամբիոն: Եթե ամբիոնը գտնում է, որ այն համապատասխանում է ավարտագրին ներկայացվող պահանջներին, ապա ամբիոնի վարիչը ստորագրում է ուսանողի կողմից լրացված հաստատման ձևաթուղթը:

**Փաստաթղթերի փաթեթ**

Ղեկավարների կողմից հաստատված ավարտական աշխատանքները պետք է ներկայացվեն համապատասխան ամբիոն մինչև ամբիոնի կողմից սահմանված վերջնաժամկետը:

*Ծանուցում.* Եթե փաստաթղթերը և հաստատված ավարտական աշխատանքը մինչև համապատասխան կիսամյակի ավարտին նշանակված վերջնաժամկետը չեն ներկայացվում ամբիոն, ուսանողը դրանք կարող է ներկայացնել հաջորդ ուսումնական տարում և պետք է մուծի բարձրագույն ուսումնական հաստատությունում հաշվառված մնալու վճարը (մոտավորապես 3 կրեդիտի վճար) այդ կիսամյակի համար:

Փաստաթղթերի փաթեթը բաղկացած է՝

- 10-15 էջ (ԲԱԿ) և 20-25 էջ (ՄԱԳ) ծավալով ավարտագիր՝ երկու օրինակով (Կերպարվեստի պատմություն և տեսություն մասնագիտության համար՝ համապատասխանաբար 40-45 և 55-60 էջ);
- Ավարտական աշխատանքի/թեզի նախագծի լուսանկար(ներ)ը;
- Ավարտագրի և ավարտական աշխատանքի/թեզի նախագծի լուսանկարների թվային տարբերակ
- Ցուցադրության համար արված ցանկացած տեսանյութի DVD տարբերակ (երկու օրինակ):

Հավելված 1: Տիրույթներ ընդհանուր

Երևանի Գեղարվեստի Պետական Ակադեմիա

ԱՎԱՐՏԱԿԱՆ ԱՇԽԱՏԱՆՔԻ/ԹԵԶԻ ՎԵՐՆԱԳԻՐԸ  
ԳԼԽԱՏԱՌԵՐՈՎ: ԱՌԱՆՁԻՆ ՏՈՂՈՎ ԵՒ  
ՄԱՔՍԻՄՈՒՄ 14 ՏԱՌԱՉԱՓՈՎ

Ավարտական աշխատանք/Մագիստրոսական թեզ

Ներկայացված է որպես Երևանի Գեղարվեստի  
Պետական Ակադեմիայի Կերպարվեստի  
Բակալավրի/Մագիստրոսի աստիճանի պահանջների  
կատարման մի մաս

Կերպարվեստի/Դիզայնի եւ Կիրառական Արվեստի Ֆակուլտետ

Շրջանավարտ՝ .....

Ղեկավար՝ .....

Ընդդիմախոս՝ .....

Երևան 20....